

Quant ditg anc?

Cussegl federal ha discutà la lescha da linguas

■ **(anr/vi) Malgrà la difficila situaziun finanziaria vul il cussegl federal tegnair en l'urari e cuntinuar cun la realisaziun da la lescha da linguas.** La mesemna è il cussegl federal sa fatschentà l'emprima giada cun la lescha. Fin us n'aveva el anc mai prendì ina decisiun en questa chausa. Sin dumonda da l'anr ha l'uffizi da cultura ditg ch'il messadi tar la lescha vegnia suttamess il november al cussegl federal. Il 2004 cumenzia il parlament a discutir las singulas prescripziuns. Quant svelto che la lescha va en vigur dependia da la discussiun en il parlament.

La Rumantschia spetga ina meglieraziun da ses status entras la lescha. Ins spera cuntant era d'obtegnair dapli finanzas per mantegnair il rumantsch.

Quant ditg ch'ils Rumantschs ston dentant spetgar sin la sprezza finanziaria stat anc en las stailas. Sch'ils politichers en il parlament vulan numnadain era discutir en quel connex la dumonda da las linguas en scola, lura poi dar in dir e lung cumbat. La lescha na cuntogna naginas prescripziuns che fixeschan l'instrucziun da linguas estras.

La lescha da linguas ha ina lunga istorgia: Il 1985 aveva *Martin Bindi*, da lez temp cusseglier naziunal, inoltrà ina iniziativa per in artitgel da linguas. Il 1996 ha il pievel svizzer ditg gea a quest artitgel. Per concretisar l'artitgel costituziunal d'ora dentant anc ina lescha che regla ils detagls. La lescha da linguas ha uss trapassà la fasa da consultaziun.